

宋元學案卷七十八

張祝諸儒學案

全祖望補本

張祝諸儒學案表

張行成——呂凝之

譙氏門人。

王卿月

並百源續傳。

祝泌——廖應淮見下杜氏門人。

傅立——程直方

祝氏續傳。

朱元昇——子仕可

並邵學之餘。——子仕立

杜可大——廖應淮——彭復初——傅立見上祝氏續傳。

王氏續傳。附吳浚。

荆□——李俊民別見明道學案。

並邵學別派。

張祝諸儒學案序錄

祖望謹案：康節之學不得其傳，牛氏父子自謂有所授受，世弗敢信也。張行成疏通其紕繆，遂成一家，玉山汪文定公雅重之。其後如祝子涇，又稍不同。至于廖應淮之徒，則益誕矣。康節本出于希夷，其後卒流而爲應淮，所謂「必復其始」者與？述張祝諸儒學案。

梓材案：張、呂二先生傳，黃氏本附康節學案，謝山序錄別定爲張祝諸儒學案。

百源續傳

郎中張觀物先生行成

張行成，字文饒，臨邛人。乾道間，由成都府路鈐轄司幹辦公事，丐祠歸。梓材案：下文云「乾道二年，表

進其書」，中間著述十年，則其丐祠當在紹興間。杜門十年，著成述衍十八卷，以明三聖之易；翼玄十二卷，以明楊

氏之易；元包數義三卷，以明衛氏之易；潛虛衍義十六卷，以明司馬氏之易；皇極經世索隱二卷，觀物外篇衍義九卷，以明邵氏之易。先生之學，歸宿在康節，故又別著周易通變四十卷，取自陳希夷至邵氏所

傳先天卦數等四十圖，敷演解釋，以通諸易之變，始若殊塗，終歸一致，共七種，凡七十九卷。先是，康節之學有所傳十四圖者，世莫之傳，先生得于蜀中估籍吏人家，因演解之，以爲象數之用，皆起于交，交則變，故曰「通變」。乾道二年六月，表進其書。詔獎之，除直徽猷閣。先生之自序曰：「康節先生謂：『圖雖無文，吾終日言而未嘗離乎是。蓋天地萬物之理，盡在其中矣。』謂先天圖也。先生之學，祖于象數二圖。象之變爲交泰，圖體極于一十二萬九千六百，而以八萬六千四百爲用，在觀物爲以元經會、以會經運、以運經世之數，其要則總于四象運行之一圖。數之變爲既濟，圖體極于一十二萬二千八百八十，而以三萬四千四十八爲用，在觀物爲日月、星辰、水火、土石、聲音、律呂、倡和之數，其要則總于八卦變化之八圖。四象運行者，天數也；八卦變化者，物數也。處乎其間，上以承天，下以生物者，地數也。故二者之用，全在卦氣之一圖，以動植通數，布爲九位，中五幹旋，卦乃生焉。二百五十六卦，會分十二，位分十六，具一十三萬八千二百四十之體，九萬二千一百六十之用，而天之運行，物之變化，自一至千八百萬之數皆在其中。衍而伸之，逐類而長之，以至于坤之無極之數，陰陽之消息，運世之否泰，人物之盛衰，可得而攷矣。夫天垂象，河、洛出圖、書，伏羲因之而畫卦，伏羲之意，傳天之意也。先生之書，盡寓乎十四圖。先生之意，推明伏羲之意也。僕不自揆，輒敷演解釋，命曰『通變』，庶幾學先天者得其門而入焉。李氏心傳嘗曰：『行成謂三陳九卦者，明天用二十七也。序十三卦者，明地用七十八也。二十七者，卦體也。其爻用則百六十二者，九九之合也。七十八者，爻用也。其卦體則十三者，閏歲之月也。』蓋亦牽合也。祝泌亦爲康節之學者，謂：『先生之書，其發明固多，其支蔓亦多。』獨魏文靖公

則盛稱之，而惜其書之不盡傳。嘗曰：『行成大意，謂理者，太虛之實義，數者，太虛之定分，未形之初，因理而有數，因數而有象，既形之後，因象以推數，因數以知理。』是則論易之名言也。『先生官至兵部郎中、知潼川府。汪文定應辰帥蜀，薦其有捐軀殉國之忠，而又善于理財。』梓材案：玉山帥蜀，在隆興二年。學者稱爲觀物先生。修。

祖望謹案：陳本堂云：『張文饒自謂精數，及其立身行事，則大悖于易，與汪玉山之言異當。』

濂案：謝山學案創記有此條，蓋案語而未及歸者，特爲附入。

梓材謹案：儒林宗派列先生于黼天授之門，蓋因黼先生傳云：『馮時行、張行成得先生之餘意。』故與馮先生牽連及之，則亦伊川私淑也。

附錄

王深寧困學紀聞曰：『張文饒曰：『處心不可著，著則偏；作事不可盡，盡則窮。先天之學，止此二語，天之道也。』愚謂：邵子詩『夏去休言暑，冬來始講寒』，則心不著矣；『美酒飲教微醉後，好花看到半開時』，則事不盡矣。』

尚書王醒庵先生卿月

王卿月，字清叔，祥符人也。南渡，卜居天台。累官至太府卿。其提刑蜀中時，從康節後人傳其易學，論人窮達壽夭甚中。及以吏部尚書充金國生辰使，語家人曰：『今年吾當厄萬里之行，其能免乎？』

已而疽發于背，或勸之辭，曰：「君命也。」行次揚州卒。先是，取其所著書盡焚之，遂無傳。

雲濠謹案：先生乾道進士。樓攻媿誌其墓云：「隆興改元，試入右庠。乾道二年，中其科，官漢陽都巡檢，非其志也，益進于學。五年，遂登進士第。」

梓材謹案：先生號醒庵居士，台州府志作臨海人。

張氏門人

太府呂先生凝之

呂凝之，字澤父，蜀人也。淳熙八年，以知閬州人覲，奏陳經世之學。阜陵大喜，以問周必大，對曰：「此必從張行成講學者。」上曰：「行成所著頗略。」必大對曰：「凝之以卦爻配年，所以加密。」留爲太府丞。其觀物篇隔眼大書云：「康節手筆也。」

邵學之餘

提幹祝子涇先生泌

祝泌，字子涇，德興人。自稱觀物老人，著有皇極經世書鈴。袁蒙齋贈之以序曰：「康節觀物篇，其學自老氏乎？致虛極，守靜篤，萬物並作，吾以觀其復，斯道也，豈獨老氏！易繫辭曰『設卦觀象』，物皆象也。又曰『聖人見天下之動而觀其會通』，物皆動也。老氏守靜觀復乃動也，易觀其動乃靜也。何動非靜？何靜非動？陰陽剛柔，互爲其根，知此者，可以觀矣。祝君好康節書，余大書觀物二字遺

之。非觀物也，自觀也。觀我生，觀民也。大觀在上，何物何我！」參袁蒙齋文集。

梓材謹案：先生一字涇甫。德興縣志載：「先生以進士授饒州路三司提幹，傳邵氏皇極之學于廖應淮。年老乞休，御書『觀物樓』扁額賜之。」元世祖詔徵，不赴。「是先生元初尚存，然考黃瑞節題蔡西山皇極經世書纂圖指要云：『邵子之書，伯溫略發其微，至祝氏而其說詳，其用異。蔡氏蓋由博而約之也。』又云：『若夫以聲起數，以數合卦，則具祝氏鈐，而邵子未言，蔡氏未用』云。似先生與蔡氏及見然者，且與袁蒙齋往來，在紹定、嘉熙間，如及元初，則當百餘歲矣。

皇極經世書鈐自序

易繫曰：「天生神物，聖人則之。天地變化，聖人效之。天垂象，見吉凶，聖人象之。」河出圖，洛出書，聖人則之。」制法垂教，祖道鉤元，是極也。先高厚而肇始，運萬有而不遺。推其動靜，得兩儀之本。沿其始交，得四象之元。循其變化，識卦位之分。得河圖、洛書而證其擬議形容之實，傳十四圖而悟布卦用卦之旨。今探蹟索隱，儻不明其所由，肇是康節之學，且入于術矣。不揣其本而齊其末，可乎？粵疏造物之圖，達于取卦之妙，而後備列先天之所由運行，動植之所以感應，而要之以折衷之法，庶幾覽者由門及序，升堂入室，識其條貫，是編也，尚少裨好古博雅之君子。若鄭氏所謂「泄天之蘊，豈無禍福」，不可謂之知言。今但虞絕學之無傳，亦何暇慮乎禍福之間哉！

巡檢朱水簷先生元昇附子仕可仕立。

朱元昇，字日華，號水簷，平陽人。所著三易備遺，家鉉翁表進之。別有邵易略例，今不傳。其言曰：「孔安國、馬融、鄭康成、關子明諸儒，皆謂自一至十爲河圖，自一至九爲洛書，惟劉牧反是。牧非無見而然也。河以通乾出天苞，洛以流坤出地符，河圖本天，宜得奇數，洛書本地，宜得耦數，此其據依以爲左驗者也。由是因往順來逆之八卦，推五行納音，以明四十五數之爲河圖，因起震終艮之八卦，推五行生成，以明五十五數之爲洛書，而三易之大綱定矣。連山，夏易也。賈公彥謂連山作于伏義，因于夏后氏，夏易不可見，卽義易可見矣。連山易卽春首純艮之義也。說卦曰：「艮，東北之卦也，萬物之所成終而成始也。」又曰：「終萬物，始萬物者，莫盛乎艮。」邵子雖以此一節爲明文王之卦，要之首艮之秘，已具此兩言，是以述連山象數圖，以備夏后氏易之遺。歸藏，黃帝易也，商人用之。黃帝命大撓作甲子，使伶倫造律呂。日辰有十幹十二枝，而其相承之數，究于六十。律呂有五聲十二律，而其相承之數，亦究于六十。乾之策三十六，坤之策二十四，此六十也。震、坎、艮之策三十二，巽、離、兌之策二十八，亦六十也。稽之以納音，定之以策數，己亥爲陰陽之終，子午爲陰陽之始，納音遇己亥、子午之間，數必交，音必藏，交則生生之機不息，藏則化化之迹不露，一象一數，莫不與圖、書合。大傳曰：「顯諸仁，藏諸用。」說卦曰：「乾以君之，坤以藏之。」是以述歸藏象數圖，以備商易之遺。卦之象，不易者四，反易者二，此以六變而成八也。重卦之象，不易者八，反易者二十八，此以三十六變而成六十四也。其說尚矣，未有究先天後天之體用，因象數之合，以驗義、文之合者。乾、坤之體，不互夫、姤、剝、復，具乾、坤之體，不互既濟、未濟，具坎、離之體，不互其餘互卦五十六。其說尚矣，未有悉以卦爻象象之辭證之者。

是以演反對互體圖例，備周易之遺。先生登右科，官政和縣巡檢。長子仕可，字起予，亦登右科；次子仕立，字起潛，皆能卒業于其父之書。

邵學別派

杜道士可大

杜可大，蜀道士也。廖應淮配漢陽軍，抵漢江濱，遇之。可大揖曰：「子非廖應淮邪？」應淮愕然曰：「道士何自知之？」可大曰：「宇宙太虛一塵爾，人生其間，爲塵幾何？是茫茫者，尚了然心目間，矧吾子邪？然自邵堯夫以先天學授王豫天悅，天悅死，無所授，同葬玉枕中。未百年，而吳曦叛，盜發其冢，得皇極經世體要一篇，內外觀象數十篇，余賄盜得之。今餘五十年，數當授子，吾俟子亦久矣。」乃言于上官，脫其籍，盡教以冢中書。其算由聲音起，應淮神鑒穎利，可大指畫未到者，應淮已先意逆悟，可大自以爲不及云。參宋文憲文集。

隱君荆先生□

荆□。

粹材謹案：先生河南隱士，嘗授皇極數學于李鶴鳴。見黃氏補本李鶴鳴傳。

祝氏門人

廖溟滓先生應淮見下杜氏門人。

杜氏門人

廖溟滓先生應淮附吳浚。

廖應淮，字學海，南城人也。自號溟滓生。抱負奇偉，年三十，遊杭，上疏言丁大全亂政狀，配漢陽軍，先生荷校行歌出都，見者壯之。蜀人杜可大者，客漢陽，言之營將，脫戎籍，授以邵子先天易數。其算由先天起數，先生神警，一授卽了。自是能洞知未知，乃坐臨安市樓賣大衍卜。卜已，輒閉樓危坐，取一鐙，按劍自鍛之，當火少休，復危坐以爲常。賈似道延之，先生直言宋鼎將移，語畢徑出。常過曾淵子家索酒，飲酣，抵掌放歌。有國子監簿吳浚者，以先天易箋、陰符經注、六花陳法欲上之朝，先生擲之曰：「嘻！誤天下國家者，此書也。」浚請受易，罵曰：「若黃口小兒耳！若能此，則人人安樂翁矣。」其後，以所傳授進士彭復之。再傳爲鄱陽傅立。所著有歷髓、星野指南、象滋說會補、畫前妙旨諸書。先生數學雖近于方伎，然亦畸士，有不可泯滅者，故附之康節弟子學案，梓材案：謝山始以是卷合王、張諸儒爲康節弟子學案，故云爾。以存其別派。

雲濠謹案：德興縣志言：祝泌傳邵氏皇極之學于廖應淮，是溟滓兼得祝氏之傳者也。

荆氏門人

莊靖李鶴鳴先生俊民別見明道學案。

廖氏門人杜氏再傳。

進士彭先生復初

彭復初，安福人。精于易，嘗本朱子、邵子之說，著易學源流。參江西通志。

梓材謹案：廖涇洋傳所謂「進士彭復之」，蓋卽先生，一名，一字爾。

祝氏續傳

文懿傳初庵先生立

傅立，字權甫，德興人也。刻意經學。先是，祝氏有皇極元元集之作，其說多與張氏異同，而進士彭復之從涇洋生別有所得，先生受之，頗有與祝氏異同者，遂通其學。入元，累官集賢院大學士。謚文懿，學者稱爲初庵先生。而程直方其高弟，乃有皇極續元元集之作。

雲濠謹案：饒州府志言：「先生得里人祝泌，皇極數學。」元史世祖本紀：「至元十六年，遣使訪求通皇極數鄱陽祝泌子孫，其甥傅立持泌書來上。」蓋先生爲祝氏後人之甥而續其傳，又可見德興縣志所云「詔徵不赴」者，謂泌後人也。

彭氏門人杜氏三傳。

文懿傳初庵先生立見上祝氏續傳。

傅氏門人

程前村先生直方

程直方，字道大，婺源人。讀書十年不下樓，尤深于易。入元，絕意仕進。行部至者必造請，或敦延至學宮，執禮受教。參安徵通志。

梓材謹案：經義考引董時父之說，言先生號前村，嘗開書室曰觀易堂，與初庵傅先生爲莫逆交，盡得邵氏不傳之秘。又言其通諸經，平生著述，易則有程氏啓蒙翼得、四聖一心、觀易堂隨筆，書則有蔡傳辨疑，詩則有學詩筆記，春秋則有諸傳考正、春秋旁通。是先生所著，不獨續元元之作，其于初庵，蓋在師友之間。

宋元學案卷七十九

丘劉諸儒學案

全祖望補本

丘劉諸儒學案表

丘密——史賓之

南軒、東萊同調。

劉光祖——游似——子汶

晦翁同調。周端朝別見嶽麓諸儒學案。

樓鑰——孫枝別見滄洲諸儒學案。

附師王默。史守之別見慈湖學案。

李鴻漸、

鄭鈞。

柴中行——饒魯別爲雙峯學案。

並晦翁私淑。

湯千

湯巾

湯中並爲存齋晦靜息庵學案。

湯漢別見存齋晦靜息庵學案。

崔與之——洪咨夔——程掌別見鶴山學案。

父世明。

攻媿講友。

柴中守——羅晉君別見槐堂諸儒學案。

柴元裕——饒魯別爲雙峯學案。

並南溪學侶。湯漢別見存齋晦靜息庵學案。

李伯玉

林大中

游仲鴻——子似見上後溪門人。

趙鞏

並慶元之學。

丘劉諸儒學案序錄

祖望謹案：自淳熙至嘉定，疏附先後諸家者，有若丘忠定公、劉文節公、樓宣獻公之徒，

雖不入諸先生之學派，然皆能用先聖之道，而柴獻肅公尤醇。述丘劉諸儒學案。材料案是卷亦謝山所特立，第其稿存者無幾，多參史傳以足之。

張呂同調

忠定丘宗卿先生密

丘密，字宗卿，江陰軍人。隆興元年進士，歷除國子博士。孝宗諭虞允文舉自代者，允文首薦先生。賜對，遂言：「恢復須遵養十年，乃可北向。」時方祈請陵寢，先生言：「泛使無益。」孝宗怒，先生退待罪，孝宗察其忠，不譴也。遷太常博士，出知華亭縣，修復海堰。累遷至樞密院檢詳文字。王抃爲樞密，先生不少下之。以逐客異議，抃訾先生不禮金使，予祠。起知鄂州，移江西轉運判官，提點浙東刑獄，進直徽猷閣，知平江府，陞龍圖閣，移帥紹興府，改兩浙轉運副使，以憂去。光宗卽位，除太常少卿兼權工部侍郎，進戶部侍郎，擢煥章閣直學士，四川安撫制置使兼知成都府。奏撤吳挺兵權，革世將之患。先生向主復讎，韓侂胄與議北伐，以圖功名。先生曰：「中原淪陷且百年，此必有夸誕貪進之人，攘臂以僥倖萬一，宜亟斥絕。」進敷文閣學士，改知建康府。將行，侂胄曰：「此事姑爲遲之。」先生因贊曰：「翻然而改，誠社稷生靈之幸。」後侂胄移書，欲除先生內職，宣諭兩淮。先生答以「不宜輕舉」。侂胄不悅。陸寶文閣學士、刑部尚書、江淮宣撫使。金人犯淮南，或勸先生棄廬、和州爲守江計，先生曰：「棄淮則與敵共長江之險矣。吾當與淮南俱存亡。」益增兵爲防。進端明殿學士、侍讀，尋拜簽書樞密院，

督視江、淮軍馬。時移金書，先生謂彼指侂冑爲元謀，宜暫免係銜。侂冑大怒，罷知樞密。○以資政殿學士知建康府，尋改江、淮制置大使兼知建康府。淮南運司招輯邊民二萬，揀爲御前武定軍。既成軍伍，淮西賴其力。以病丐歸，拜同知樞密院。卒，諡忠定。先生儀狀魁傑，機神英悟。嘗慷慨謂人曰：「生無以報國，死願爲猛將以滅敵。」切齒君父之仇，雖其忠義性然，而先後建議規切時勢，器識宏遠，非專恃血氣者比也。參史傳。

雲濠謹案：先生諡一作文定。黃氏日鈔讀葉水心集云：「丘文定之父仁，不忍校費，幾盡產。母臧氏，既寡，力貧教子孫。」湖、袁清容集亦俱作文定。

附錄

葉水心祭先生文曰：「自古講學，祖性宗命，克己復禮，終始篤敬，惟公本原，我則素知，授之塵尾，張、呂同歸。」

晦翁同調

文節劉後溪先生光祖

劉光祖，字德修，簡州人。第進士，除劍南東川節度推官，辟潼川提刑司檢法。淳熙五年，召對，論恢復事，請以太祖用人爲法。除太學正。召試正字，兼吳益王府教授，遷校書郎，除右正言、知果州。

○「罷知樞密」，宋史本傳作「罷密，以知樞密院張巖代之」。

以趙忠定薦，召入。光宗卽位，除軍器少監兼權侍左郎官，又兼禮部。時殿中侍御史闕，上方嚴其選，宰相留正舉先生，上曰：「久在朕心矣。」先生入謝，因論：「本朝士大夫學術議論，最爲近古。咸平、景德以來，至于慶曆、嘉祐盛矣。不幸而壞于熙豐之邪說，幸而元祐君子起而救之，未流大分，事故反覆。紹聖、元符之際，羣凶得志，絕滅綱常，其論既勝，其勢既成，崇觀而下，尚復何言。臣始至時，聞有譏貶道學之說，而實未睹朋黨之分。逮臣復來，其事果見。因惡道學，乃生朋黨，因生朋黨，乃罪忠諫。嗟乎，以忠諫爲罪，其去紹聖幾何！」劾罷戶部尚書葉翥、中書舍人沈揆結近習，圖進用，言：「比年以來，前輩老成，零落殆盡。後生晚進，議論無所據依，學術無所宗主，正論益衰，士風不競。幸詔大臣，妙搜人物，必朝野所共屬，賢愚所同敬者一二十人，參錯立朝，國勢自壯。」出知夔州。時孝宗不豫，上不過宮，先生致書留公與忠定曰：「上未過宮，宰執不可歸安私第。」孝宗崩，又詒書忠定，勉以安國家、定社稷之事。寧宗卽位，除侍御史，改司農少卿。入對，獻謹始五箴。進起居舍人，遷起居郎。朱子議卜孝宗山陵，予祠，先生言：「漢武帝于汲黯，唐太宗于魏徵，仁宗于唐介，皆慙怒旋悔。熹明先聖之道，爲今宿儒，又非三臣比。陛下初膺大寶，招徠耆儒，此初政之最善者。」再疏，不聽。劉德秀劾先生，出爲湖南運判，不就，主管玉局觀。既而，忠定罷相，韓侂胄擅朝政，遂目士大夫爲僞學，禁錮之。先生撰涪州學記，謂：「學之大者，明聖人之道以修其身，而世方以道爲僞；小者治文章以達其志，而時方以文爲病。好惡出于一時，是非定于萬世。」諫官張釜指爲謗訕，比之楊惲，奪職，謫房州。久之，起知眉州，復職，將漕利路，以不習邊事辭。進直寶謨閣，主管沖佑觀。侂胄誅，召除右文殿修撰，以寶謨閣直學士知潼